

14.089


L'ESTAT d'Espagne.

Avec le proces verbal de l'hommage
faict par l'ayeul du Roy Philippes
à present regnant, au Tres-
Chrestien Roy de France
Loys xii. de ce nom
l'an 1492.



M. D. XCIIII.





SVR L'ESTAT D'ESPAGNE
ET LE PROCES VERBAL.

Miserables François, qui d'erreur enchantez
Voulez vostre franchise au Roy d'Espagne
vendre,

Venez avec horreur en ce discours apprendre
Comme il a ses voisins par fraude supplanté.

Et vous qui sans sujet sa grandeur exaltez,
Credules aux faus bruits qu'il fait par tout espandre,
Venez voir son ayeul un iuste hommage rendre
Aux pieds d'un de nos Rois en armes indontez.

Pourueu que la liqueur d'un sōmeilleus breuuage
Ne vous face à clos yeux courir dans le seruage,
Et du loz des François mettre en oubly le prix:

Voyans sous ce tyrā gemir tant de prouinces,
Et sa race sortir d'un vassal de nos Princes,
Deuez-vous pas le craindre, ou l'auoir à mespris?

*Traicté d'aucuns droits du Roy Philippes
és Estats qu'il tient à present.*

C'EST chose remarquee de toute antiquité, que Dieu a estably certaine duree aux monarchies, estats, maisons, coustumes, & vie des hommes: ceux touresfois d'entre eux sont plus durables, qui plus retiennent de la perfection de leur Createur: les vns creéz pour servir de ministres de sa fureur, les autres pour l'exemple de sa bonté & grace. Je dy cecy, pour s'estre veu des hommes & estats, que la main de Dieu a, de petits qu'ils estoient, eleuez au sommet de grandeur & prosperité, les faisant seigneurs d'Empires & Royaumes, desquels, quoy que peu vertueux, Dieu s'est seruy comme d'un fleau, pour punir la preuarication de ses peuples. Les autres ont esté establis de Dieu en ce supreme degré de maiesté humaine, pour recompense de la saincteté de leur vie, & integrité de leurs mœurs: mais si tost que les vns & les autres ont commencé à me-
cognoistre l'occasion, pour laquelle ils sont
en ce monde, qui est d'establir le regne,

l'honneur & seruice de Dieu seul, qu'ils ont pour commun pere & seigneur avec les autres hommes: & qu'ils ont cherché d'establiir, voire par faux moyens & pretextes leur honneur, & non celuy de leur maistre, Dieu qui seul regne, & à qui tout doit seruir, brise leur chef, & dissipe leur monarchie, & les arrache de la terre.

Pour exemple, la couronne de Castille, anciennement petit pais gouuerné par Iuges, puis par Comtes, en fin par Rois, creez par la benedicence de Sances 4. du nom roy de Nauarre, surnommé le Grand, fut ysurpee par Isabel sur la fille de Henry dernier du nom roy de Castille: ladite Isabel se maria à Ferdinand fils de Iean roy d'Arragon, dont leurs royaumes creurent presque de nostre memoire en beaucoup de puissance. Mais pour auoir leurs possesseurs non contens des biens que Dieu leur donnoit en la terre, enuahy ceux d'autrui, ils semblent à present menacer ruine, ainsi que i'espere deduire.

Ce Prince donc, ambicieux si iamais il en fut, entre autres ses chefs-d'œuvres, à fin de retirer du Roy de France Charles 8. le comté de Roussillon, ne fait difficulté d'abandonner son cousin germain & beau-

frere Ferdinand roy de Naples, à la fureur
 des armées que dressa contre luy Charles 8.
 pour recouurer ledit royaume. Puis sous le
 regne de Loys 12. enfreignant le degré d'al-
 liance & parenté qu'il auoit avec Frideric
 lors roy de Naples, s'accorda avec ledit
 sieur Roy Loys, pour deposséder ledit Fri-
 deric du royaume de Naples, & le partager
 (comme ils firent) ensemble. Depuis sous
 couleur de vouloir porter la querelle du
 Pape Iules 2. contre l'Empereur Maximi-
 lian & le Roy de France, mais à la verité
 pour la crainte qu'il auoit de la grandeur
 dudit sieur Roy; qui le pouuoit debusquer
 des iniustes possessions qu'il auoit en Italie,
 entretenit en mauuaise affection ledit Pape
 Iules vers ledit sieur Roy, & luy suscita le
 roy d'Angleterre, & les Suisses, pour luy fai-
 re guerre. Enuahit aussi sur sa propre niepce
 Catherine (sous pretexte que son mary ad-
 heroit au Roy de France) le royaume de
 Nauarre son propre heritage, apres lequel
 conquis, il ne peut par meilleurs moyens s'y
 entretenir, & se l'asseurer, que par vn sem-
 blant d'estre prest d'entendre à le restituer
 à sadite niepce: pourueu que pour mieux y
 aduiser, trefue luy fut accordée d'vn an
 avec le Roy de France, pendant laquelle

au lieu de le restituer, il fortifia ce qu'il vou-
 lut des places d'iceluy: rasa tout le reste
 des villes & forteresses, iusques à defendre
 qu'il ne fust fait aucun labourage de la ter-
 re, à fin d'oster tout moyen de recouurer
 les places par luy retenues & fortifices au-
 dit royaume. Ce ne fut pas tout: car avec
 la force il voulut coudre la finesse, & s'ai-
 der de pretexte de religion pour s'y mieux
 conseruer, faisant declarer excommunié le
 roy de Nauarre mary de sadite niepce, pour
 auoir adheré au Roy Loys douzieme, Prin-
 ce si saint & si bon, qu'encores parmy
 nous luy demeure le nom de Pere du peu-
 ple: & sur cest excommuniement enuoya
 force prescheurs dans le royaume, à fin de
 diuertir les peuples de se retourner vers leur
 roy & roine legitimes. Et ce moyen luy
 ayant bien succédé, & voyant ledit roy &
 roine de Nauarre morts peu de temps apres
 à huit mois l'un de l'autre, il laissa suiure
 Henry leur fils son arriere-neueu de mini-
 stres de l'opinion de Luther (ie ne veux dire
 comme aucuns, qu'il les luy fait enuoyer)
 lesquels tirans en haine le Pape, pour le tort
 fait à leur pere, de l'excommunier à l'appe-
 tit de Ferdinand son oncle, qui de tout
 temps auoit aguetté ledit royaume, leur fut

aisé de transporter le cœur de ce ieune Prince, principalement celuy de Marguerite sa femme sœur du grand Roy François, de la haine du Pape à la haine de sa religion propre. Voilà le moyen iuste, par lequel la couronne de Castille a receu cest accroissement d'un si beau royaume que celuy de Nauarre. Mais qu'en aduint-il ? Ferdinand en iouit fort peu, & de tous les autres royaumes, permettant Dieu qu'ils passassent en autre famille, & que tous ses enfans males & femelles, qui estoient en grand nombre, mourussent pendant sa vie, hors-mis Ieanne mariee à Philippes Archiduc d'Autriche, prince genereux, mais de peu de vie, & apres la mort duquel elle tomba en demence, laissant toutesfois deux grands princes Charles & Ferdinand enfans dudit Archiduc & d'elle.

Ce prince Charles paruenù à la couronne par la mort dudit Ferdinand (car il se porta roy, nonobstant la vie de Ieanne sa mere, laquelle il detint prisonniere) rechercha fort l'alliance de France, promit par infinis traictez (mesme celuy de Noyon) faire raison du royaume de Nauarre, ce que toutesfois il ne fit. Et fauourant de plus en plus la douceur du commandement, s'empara

& se fit pouruoir des deux ordres militaires de saint Iacques, & de Calatrava d'Espagne, au preiudice de Ferdinand son frere, à qui elles estoient resignees: ouurit aussi les yeux à l'Empire, l'obtint, & iouit de tous les royaumes & seigneuries delaissees par ledit Ferdinand d'Arragon, & que tenoit sa mere la loca, & des estats de Flandres & provinces y annexees, laissant à son dit frere seulement quelque partage vers le pais d'Austriche, duquel apres quelques differents entre eux, il voulut comme prince moderé se contenter, ne s'estant depuis fâché contre son dit frere fait Empereur, sinon de ce qu'il l'auoit sollicité de resigner à son fils Philippes, à present regnant, l'estat de Roy des Romains, duquel il estoit possesseur, à fin que ledit Philippes peust au preiudice dudit Ferdinand son oncle succeder à l'Empire.

L'ambition veritablement est chose detestable à Dieu, qui veut que les hommes se contentent du partage qu'il leur donne en la terre: mais les pretextes qui se prennent du pur seruice de Dieu pour autre sujet, sont encores pires, & crient plus de vengeance deuant sa sainte face.

Iene veux dire que ce prince Charles
quint,

quint, sous couleur de defendre la religion Catholique en Allemagne, ait voulu (comme aucuns ont dit) enuahir l'estat & la liberté des princes d'Allemagne : mais bien diray-ie que luy & Philippe roy d'Espagne son fils, se sont employez (par la propre confession que m'en ont faite ses propres ministres l'un d'eux encores viuant, comme ie croy, le sieur de Champigny nagueres chef des finances en Flandres, frere du Cardinal de Granuelle) vers les protestans d'Allemagne pour, suiuant les vestiges du susdit Ferdinand d'Arragon leur deuancier, faire imbuer le defunct roy de Nauarre de l'opinion Lutherienne, à fin de l'esloigner davantage de la couronne de France, de l'alliance des François, & du recouurement de son royaume de Nauarre. Que si celuy qui seduit vn simple enfant est prononcé de Dieu estre de pire condition, que s'il estoit ietté au profond de la mer ayant vne pierre pendue au col : quel iugement sera fait à celuy qui ne seduit ou scandalise seulement vn enfant, mais fait seduire vn roy & tout vn royaume? Ne profitans assez ce leur sembloit par ce moyen, furent enuoyez cinquante mil escus au roy lors de Nauarre, & quelques cheuaux en don pour mouoir la

guerre en France, lesquels cinquante mil
 escus toutesfois furent refusez. Tesmoi-
 gnent en outre assez de ceste mauuaise in-
 clination & affection du roy d'Espagne le
 Marquisat de Saluces, lequel a fait ja par
 deux fois entreprendre au Duc de Sauoye
 son gendre, à la premiere recouuré par la sa-
 ge conduite de monsieur de Rhets Maref-
 chal de France: la pernicieuse ligue dressée
 en ruine de la France, voire de tous les
 estats de l'Europe. En font aussi assez de foy
 (comme de son bon naturel vers chacun)
 les places empruntees en Allemagne de
 l'Archeuesque du Liege & Colongne, pour
 y mettre garnisons, & dresser visée à l'Em-
 pire d'Allemagne au preiudice de ses cou-
 sins, enfans de Ferdinand d'Austriche, sous
 couleur de faire rampart contre les Prote-
 stans d'Allemagne, pour le bien de la reli-
 gion Catholique: les prattiques faites &
 qui se font en Italie, les parties dressées en
 Polongne, Dannemarch, Angleterre, Es-
 cosse, & autres lieux de la terre ne chantent
 autre chose: & se peut dire le roy d'Espa-
 gne ressembler à ceux qui detenans iniuste-
 ment vn heritage, cherchent par plus grans
 meffaits esloigner les propriétaires du re-
 couurement d'iceluy. Mais les iugemens

de Dieu sont grands, ses conseils esmerueillables, & les effets de sa iustice inestimables. Il permet selon le dire de l'Apostre, que nous soyons ordinairement punis par ceux vers lesquels nous pechons. Les peres du roy d'Espagne & luy ont voulu ruiner les Rois de France, & particulièrement le Roy Henry quatrieme à present regnant, & abusans du pretexte de religion, reculer ce legitime successeur de la couronne de France, qu'ils voyent plein de valeur, & nourry (comme lon dit) de sang & mouëlle de lyon, disposé à vendiquer vn iour son iuste heritage. Mais Dieu qui hait plus vn qui abuse du saint nom de religion, que celuy qui ayant esté seduit à dessein (comme ledit sieur Roy) s'est deuoyé d'icelle, a voulu faire naistre à present ce Roy, qui delié de tant de pieges à luy tendus, a receu la couronne de France, à luy presentee par vne armee puissante, qui s'est submise à luy avec tous les grands, & plus gens de bien de la France. Et quand? Lors qu'on le pensoit par les trauerses & mort prattiquee du feu Roy Henry troisieme, plus eloigné du diadème d'icelle.

L'Allemagne de son costé ouure les yeux pour se munir contre ce roy d'Espagne, qui

comme vn aigle pensoit ja tenir l'Empire du monde en ses serres. L'Italie fait le mesme, & ja ce bastiment de royaumes composé de tant d'vsurpations se commence à dissoudre. Ia les estats de Holande & Zelande, recognoissans par iuste iugement de Dieu, combien à tort ils ont esté distraits & rauis de l'obeissance de Iacqueline de Hainault leur Comtesse & legitime princesse (qui pour auoir la vie sauue fut contrainte de quitter son estat) se sont faits libres, aimans plustost mourir que d'estre sujets à domination si intolerable que l'Espagnole.

Les prouinces de Gueldres & Zutphen, substraies des legitimes seigneurs par la donation, que prattiqua le dernier Duc Charles de Bourgongne, mort deuant Nancy, d'Arnould lors Duc prisonnier, au preiudice d'Adolf son fils, se sont aussi retirez de son obeissance: Le pais de Frize a fait le mesme.

Les plus sages & moderez des pais bas de Flandres, Hainault, & Arthois, tendent les bras aux Rois de France, non du tout pour les demesurees impositiōs (comme de vingt sols pour moulte d'vne mine de blé, quarante sols pour vache qui se tue ou nourrit, & autres, que lon fait payer en Flandres)

mais par ce qu'ils sçauent qu'ils sont du domaine ancien de la couronne de France, & que Flandres en fait l'un des membres & Pairies : crient tout haut, qu'il n'a esté au pouuoir du Roy François premier (lors prisonnier) de les abandonner, & y auoir en cela lieu de restitution, puis que c'est loy tenue de tous, que prisonnier gardé estroitement, comme estoit ledit sieur Roy, n'est tenu à chose promise, & demeure en liberté de sa foy.

Ceux de l'Isle, Douay, & Orchies, principales villes du pais bas, sçauent & se recognoissent appartenir au Roy de France, ayant Philippes le Hardy promis au Roy Charles cinquieme de France (qui les luy laissa lors de son mariage avec l'heritiere de Flandres) les luy retroceder si tost que Dieu auroit appellé à soy Loys de Marle Comte de Flandres son beau-pere, & s'en obligea par contract passé à Peronne le vingtieme Septembre 1368. sous l'obligation de luy & ses successeurs, & à peine de censures Apostoliques, dont le roy d'Espagne est tenu, comme courantes sur son ame.

Et quant à Milan, Sicile, & Naples, chacun sçait les droits que la France a en iceux.

Et pour le regard du royaume de Ma-

iorque, comtez de Sardegne & de Roussillon (dont sont encores deuz à la couronne de France les trois cens mil escus que fournit Loys onzieme lors qu'il en eut l'engagement) Loys d'Anjou en auoit le don que luy feit la marquise de Montferrat, sœur & legitime heritiere de Iacques dernier roy de Maiorque.

Quant à la Biscaye, elle appartenoit au Duc d'Alençon de France, à cause de sa mere Marie de Lara dame dudit pais: mais elle n'en sceut auoir raison de Henry 2. du nom roy de Castille, comte de Tristemare, fait seigneur par l'aide & seules armes du Roy de France Charles cinquieme, qui y enuoya Bertrand du Guesclin son Connestable. Et de ce roy (quoy que bastart) vient le droit que le roy Philippes à present regnant a en l'Espagne: Comme aussi luy viennent du costé de bastards ceux qu'il pretend à Milan, Naples, Sicile, qui ne luy sont encores fort asseurez.

Quant à Arragon, sauf la querelle de la donation faite par Martin Pape, successeur de Nicolas, à Philippes 3. Roy de France, ou Charles son second fils, au preiudice de Pierre roy d'Arragon, mary de Constance, fille de Manfroy de Naples, bastart de Fri-

deric 2. Empereur & roy dudit Naples : & les droits de Matthieu de Castelbon, comte de Foix & Bearn, à cause de Ieanne fille de Iean, fils de Pierre roy d'Arragon : sauf aussi les donations de René d'Anjou roy de Sicile, au Roy de France Loys onzieme, à l'aide duquel il fut couronné roy dudit Arragon, à Barcelonne: la maison de Lorraine y peut pretendre quelque droit, à cause d'Yolant, sortie du second mariage dudit Iean d'Arragon, fait avec Yolant fille du Duc de Bar, mariee à Loys d'Anjou, qui fut forcé composer pour tous droits à cent soixante mil florins.

Et quant à Portugal, c'est chose encores fort mal-assée en la maison d'Espagne, tant pour l'inimitié inueterée qui est entre ces deux prouinces, que pour les droits qui s'y peuuent pretendre : entre autres par les successeurs, ou ayans cause de la maison de Boulongne, dont le pais qui est Boulenois en Picardie, est de present annexé à la couronne de France. Car Alfonse roy dudit Portugal, marié à Mahault ou Mathilde comtesse dudit Boulongne, en eut deux enfans : & aduint que comme elle estoit en Boulenois, pour donner ordre aux affaires de sondit Comté, ledit roy de Portugal

épris de la beauté de Beatrix, fille bastarde d'Alfonse, dit le sage ou l'astrologue, roy de Castille, Leon, & Toledé, ou des commoditez que presentoit ledit roy de Castille avec elle, sans autre ceremonie l'espousa, laissant Mathilde, qui vescu douze ans durant ce deshonneste mariage, ou plustost concubinage: & retournée en Portugal fut forcee se retirer en France, pour faire ses plaintes au Roy, & depuis au Pape Alexandre quatrieme, qui excommunia ledit roy de Portugal & sa nouvelle femme: & neantmoins les enfans de ceste femme illegitime ne laisserent d'vsurper le royaume, sur les legitimes de la premiere. Le Duc de Parme Rainuce qui est à present, y a aussi tres-apparent droit, à cause de Marie sa mere, fille d'Edouart fils du roy Emanuel de Portugal: le roy d'Espagne qui l'a vsurpé, n'estant sorty que d'une fille dudit Emanuel, & Rainuce du fils. Se presente aussi Dom Antoine roy de Portugal, lequel est fils pretédu bastard de Loys frere aîné dudit Edouart: mais legitime par le Pape, & sentence des deputez du saint Siege, avec cognoissance de cause, lequel en consequence de ce a esté eleu roy de Portugal par le peuple, suiuant la loy mentale dudit royaume.

Le Roy de France Henry quatrième demâde le royaume de Nauarre comme à luy appartenât du chef de sa mere, heritiere de la susdite Catherine, niepce du susdit Ferdinand d'Arragon : de laquelle le propre heritage, qui estoit ledit royaume, n'a peu se perdre à son dommage, quand mesme son inary seroit tombé en quelque faute. Luy appartiennent les places de la Solierra, dependantes de toute ancienneté d'iceluy royaume, que la roine Isabel, femme premiere dudit Ferdinand, par son testament, & pour descharge de sa conscience, ordonna estre restituées, comme ayans esté vsurpees par ceux de Castille sur Nauarre. Luy appartiennent encor les Duchez de Gandie, Montblanc en Arragon, & Pegnasset: le comté de Ribagorcea, l'Infantasgo de Castille, la cité de Balaguer, & villes de Castrocheris, Harao, Villalon, Cuellar, que le roy Iean pere dudit Ferdinand d'Arragon, donna au royaume de Nauarre: à la charge qu'en recompense de ce il iouyroit d'iceluy royaume sa vie durant, soit qu'il eust enfans ou non de son mariage avec Blanche fille de Charles roy de Nauarre 3. du nom, petit fils de Philippes d'Eureux de la maison de France: & sont deuz aussi à sa

maiesté, quatre cens vingt mil cent douze florins d'or, six sols huit deniers d'Arragon, du rapport du mariage de ladite Blanche, desquelles choses est tenu le roy d'Espagne.

Ce n'est pas tout, le propre royaume de Castille & Toledé se peut legitiment quereller par ledit Roy de France, comme successeur de saint Loys: & ne s'y peut alleguer prescription. Car elle ne s'admet iamais en matiere de royaumes, & de chose acquise de mauuaise foy. Le droit de sadi-te maiesté est tel, Henry premier du nom roy de Castille & Toledé, fils d'Alfonse 4. de Castille, & de Leonor fille de Henry second roy d'Angleterre, & de celle Leonor que repudia Loys le Jeune Roy de France, mourât sans enfans d'un coup de tuille qui luy tomba sur la teste, laissa ses sœurs: l'aîsnee, Blanche, mere de saint Loys: la seconde, Berenguere, femme du roy dom Al-fonse de Leon: & la troisieme, Leonor femme du roy d'Arragon. Or ladite Berengue-re auoit esté separee du roy de Leon son mary par ordonnance d'Innocent Pape, tiers du nom, d'autant qu'ils estoient pa-rents. Elle se retira dès lors vers ledit Hen-ry son frere, avec son fils Ferdinand qu'elle auoit eu dudit roy de Leon. Et ayant fait

infinis seruiteurs en la Cour de Castille, voyant le Roy saint Loys eloigné & empesché en autres guerres, elle dressa si bien sa brigue qu'au preiudice dudit saint Loys elle fit elire sondit fils Ferdinand, roy de Castille & Toledé, sous esperance qu'elle donna aux Castillans, qu'en la personne de sondit fils, se reioindroit le royaume de Leon à celuy de Castille, & qu'ils euiteroiēt par ce moyen la domination d'un prince François estrangier. Saint Loys en fit lors instance, mais comme ils le sceurent amuser de promesses, de luy restituer le tout: ne s'y estant peu lors transporter, à cause desdites guerres, tout en demeura là.

Je sçay bien que les Espagnols alleguent, que ledit saint Loys en composa depuis par le moyen du mariage de sa fille Blanche avec Ferdinand de Leon fils d'Alfonse dict le sage ou l'astrologue, eleu à la faueur des François Empereur d'Allemagne, à l'encontre de Richard fils de Jean roy d'Angleterre. Mais ores qu'ainsi fust, ce que toutesfois ne leur est accordé, le Roy de France ne demeure sans un second droit ausdits royaumes. Car depuis, Dieu ne permettant qu'une si iniuste vsurpation eust lieu, ledit Alfonse le sage fut depouillé de

l'Empire par Rodolphe, eleu & mis en sa place pendant sa vie: fut aussi depouillé par Sance son second fils de partie desdits royaumes, à l'aide du roy Maure Mahomat Myr de Grenade, avec lequel ledit Sance se ligua pour faire guerre à son pere, dont ledit Alfonse dit le sage indigné, & craignant qu'il depossedaſt aussi ses petits enfans, sortis de son fils aîné Ferdinand de la Cerde nouvellement mort, auxquels deuoient appartenir les royaumes, il luy donna malediction & le desherita, declarant par son testament pour son heritier aux royaumes le fils aîné de son dit fils aîné: & où il ne les pourroit posseder, substituoit au preiudice mesme de ses deux autres fils Iean & Iacques, Philippes fils de S. Loys, auquel (meu du propre tesmoignage de sa conscience) il recognoissoit lesdits royaumes de Castille & Toledé appartenir. Et cessans tous ces droits de saint Loys, encorres appartiendroient ces royaumes aux descendans dudit Ferdinand de la Cerde, dont y a encorres quelques restes en Espagne, qui possible ne s'en voudront pas tousiours taire: & l'un des descendans dudit Ferdinand de la Cerde, Alfonse pere de Iean d'Espagne Connestable de France

ſeſtant porté roy dudit Caſtille & Toledé, ſit don à Philippes d'Eureux roy de Nauarre du païs de Guipuscoa, Alaua, & Rioja, qui auoient eſté des appartenances de Nauarre, que le Roy de France qui eſt à preſent, peut encor comme Roy de Nauarre reclaimer.

Ie ne veux m'arreſter à infinis autres droits, que non ſeulement la France, mais l'Empire, & autres ſeigneurs particuliers peuuent pretendre ſur les terres que tient le roy d'Eſpagne (qui par alluſion à la maiſon d'Autriche, ſe peut dire D'autruy riche) Auſſi peu toucheray-ie au partage que peuuent pretendre les filles dudit roy d'Eſpagne avec ſon fils, tant du royaume de Leon, qu'autres biens d'ancienneté partables entre fils & filles. Et auſſi peu à la leſion de partage pretendue par deſunct de bonne memoire l'Empereur Ferdinand d'Autriche, contre Charles quint ſon frere, pere du roy d'Eſpagne Philippes à preſent regnant.

Ie ne veux auſſi conter les reuoltes qui ſe dreſſent és Indes pour les intolerables impoſts que leur fait porter le roy d'Eſpagne, qui les contraint payer tous les ans (comme en Eſpagne) leur part de l'obten-

tion d'une bulle du Pape, pour pouuoir manger chair, œufs, & fromages en iour de poisson, hommes & femmes, pauvres & riches des villes & villages de l'âge de sept ans & au dessus: & fait ceste contrainte en consideration des frais qu'il dit auoir faits à l'obtention de ladite bulle, qu'aucun ne peut refuser de prendre, encor qu'il ne voulust manger chair ny fromage. Et ce qui se prend pour teste, est dix sols valans deux reaux en Espagne, & aux Indes se prend dixhuit ou vingt reaux pour chaque teste, sans laquelle bulle nul ne peut ny doit (à ce que dient les prescheurs à gaiges d'icelle) estre enterré en terre sainte, ny entrer en l'Eglise. O abus abominable! ô peché contre le saint Esprit, de ceux qui se disans defenseurs de la religion, vendent à leurs propres sujets le secours qu'ils disent obtenir pour remede de leurs ames! Voilà vn beau reuenu, & pour estre long temps fauorisé de Dieu! Mais ce pendant c'est le plus grád de toute l'Espagne. O miserables & denaturez François, qui fermant les yeux à tant d'iniquitez vous laissez seduire par cest Or si mal acquis. Reste leur Inquisition qui sert plus à voller le bien de l'innocent & miserable, qu'à contenir les hommes en la

religion, dont ils n'ont que le masque. Aussi l'Espagne s'en va dépeuplée pour ces cruautés intolérables, & pour l'alcaualle, qu'ils appellent le dixieme denier de toute vente & reuente, voire de l'habit que porterez neuf en vos malles. Qui sera donc l'homme si miserable qui vueille admettre en nostre France telles gens, desquels le nom est si mal receu, que le nommer tant seulement en fait horreur aux petits enfans de la terre? Las! gardez François, qu'il vous soit reproché deuant Dieu d'auoir chassé vos freres pour loger des peuples barbares: gardez que ceste malediction tombe sur vous d'estre iustement appelez viperes, qui dechirez les entrailles de vostre propre mere, c'est à dire, de vostre propre patrie: & croyez que tout homme qui voudra ruiner le bastiment de la France demeurera enseuely dans les ruines. Que si les loix punissent l'homme pour auoir tué son semblable, combien à plus forte raison seront punis ceux qui ne tuent seulement vn homme, mais procurent la mort entiere à vn Royaume?

Le roy d'Espagne qui cy deuant disoit qu'il ne falloit traicter avec nostre Roy deuoyé de la foy, ne laissoit cependant, & ne

laisse encorés d'essayer de faire paix avec ses sujets de Hollande & Zelande tous Luthériens, Calvinistes ou Anabaptistes : il offre les laisser en l'exercice libre de leur religion, leur laisser leurs villes & gouuernemens en l'estat qu'ils les tiennent, demande seulement qu'on le recognoisse pour roy. Mais lesdits Estats sçauent assez à qui ils appartiennent, & ce que c'est de la domination Espagnole, & que ceste nation applaudit, comme le crocodile, lors qu'elle veut ietter son venin ou mordre : tesmoins les pauvres Comtes d'Aiguemont, & de Horne, faits cruellement mourir, nonobstant leurs seruices pour la reduction du pais, & foy à eux promise. La mort aussi procuree, lon dit par poison, au pauvre sieur de Montigny : la fin du pauvre Marquis de Bergues, & de toute la noblesse que par l'un ou l'autre moyen ils exterminent.

Le Roy Henry quatrieme se sçaura bien deffier de leurs faulses pratiques, nonobstant l'enuoy d'un pourtrait de l'Infante : il peut trop bien sçauoir que lors que Ferdinand d'Arragon dernier, & Philippes Archiduc d'Autriche traictoient du mariage de madame Claude de France avec Charles quint, pere de Philippes à present regnant,

gnant, & apres le mariage mesme conclu, iuré & arresté à Blois, les Lieutenans du Roy de France Loys douzieme ne se defians de rien, les Espagnols leur coururent sus, defaisans deux armées Françoises, l'une en Calabre conduite par le sieur d'Aubigny, l'autre à la Cirignolle conduite par le Duc de Nemours messire Loys d'Armignac: les chefs desdits Espagnols, allegans pour leurs excuses qu'ils n'auoient defences de leur maistre de faire la guerre.

A present le roy d'Espagne âge de soixante & sept ans & plus, mal-disposé comme il est, de sa personne, se voit au bout de ses finesses, ne sçait par quels moyens conseruet ce qu'il a rauy, ses belles promesses s'alem- biquent en rien, sa mine est euentee, & son conseil descouuert: il cherche d'aider au plus foible en France, à fin de nous entretenir en guerre, de peur que le plus foible party par faute de moyens, abandonne la guerre. Il nous veut matter l'un par l'autre, à fin de luy seruir de proye. Il cherche de nous defaire par nos propres atmes, par ce qu'il ne le peut par les siennes. Il entretient guerre en nostre pais, de peur que la luy factions au sien: & si le party qu'il soustient deuenoit le plus fort, il luy feroit inconti-

nent la guerre. Il n'est pas encores à solliciter (comme lon dit) les huguenots de France, pour se rebeller contre le Roy Henry quatrieme, & luy faire la guerre.

Que donc tous Princes & potentats se gardent des entreprises & conseils d'un voisin si charitable: & vous François, faites vous sages par vostre propre dommage. Je vous adiure tous par l'honneur & respect que deuons à Dieu, par la foy, amour, & loyauté que deuons au Roy Henry quatrieme donné de Dieu à la France, fils de vos predecesseurs Rois, issu de saint Loys: & par la charité que deuez à vostre patrie, & au salut de vous, de vos femmes, & de vos enfans, & à la conseruation de nostre religion, temples & fortunes, faites cesser en vous ceste opiniaistre rebellion (si elle treuve encores place en aucun) & la reduisez à vne deuë obeissance, qui seule peut faire, apres la grace de Dieu, renaistre sur nous l'heur de nos peres, & la paix de leurs siecles.

Aucuns preschent que la religion periclite, & que plusieurs des peres en la primitive Eglise sont morts pour la foy Catholique, & qu'il nous faut mourir pour icelle: ie l'accorde, mais il nous faut bailler les es-

critures comme elles s'entendent. Nous sommes tous prests de mourir quand lon nous forcera de renoncer à nostre Seigneur IESVS CHRIST, & de sacrifier aux idoles, ou d'aller au presche. Lors & non autrement se doit subir la mort, & l'ont receüe nos peres, & mourrons auant que d'estre autres que sectateurs de la religion Catholique, Apostolique Romaine. Nos peres en l'Eglise ont fuy en temps de persecution, & nul d'eux n'a resisté aux Rois avec les armes, trouuans plus de merite à souffrir qu'à se reuolter. Nostre Seigneur conseilla aussi à ses Apostres de fuir en cas de persecution, de cité en autre, & non de resister par armes.

Et vous messieurs les Ecclesiastiques, sçachez que iamais la doctrine que Dieu nous a donnée (principalemēt à vous comme en depost) n'acquerra sa clairté tant que la guerre en troublera les ruisseaux, partis d'vne si belle source. O que la ligue monstre bien estre prouenue des cauernes d'Enfer, puis qu'elle diuise les Catholiques, qui vnis eussent trop mieux fait la guerre aux heretiques. Sçachez que vous avez besoin du glaue materiel, qui est celuy du Roy, pour vous faire viure en seureté, repos &

iustice, & maintenir ceste nostre Religion,
 laquelle estant la vraye ame du corps de
 cest Estat, il est besoin conseruer le Royau-
 me en son entier, sans le diuiser en ses mem-
 bres, de peur que par ce retranchement de
 l'un ceste ame ne s'enuolle. Voyez ie vous
 prie le fruit des predications d'aucuns
 d'entre vous, possible (quoy que non tous)
 meuz de bon zele, mais non reglé (comme
 dit l'Apostre) selon la science : vous auez
 fourny de soufflets & de paille pour allu-
 mer nos querelles. O fureur, fureur indi-
 gne de vostre Prestre! Ainsi est aduenu
 que millions de personnes sont peries de
 vos troupeaux sans confession, sans sacre-
 mens, voire sans sepulture : de cent Eglises
 à grande peine en trouuerez-vous vne en-
 tiere, ny en dix villages vn Curé, si ce n'est
 au pais obeissant au Roy. C'est pourquoy
 defunct monsieur Vigor, des plus celebres
 Docteurs en Theologie de la France, &
 pour la doctrine fait par le saint Pere, Ar-
 cheuesque de Narbonne, disoit en ses Ser-
 mons sur les iours de la Trinité & saint
 Martin, *Si Dieu nous vouloit tant affliger que
 nous donner vn Roy Turc ou heretique, encores
 ne faudroit leuer les armes contre luy, ny luy faire
 la guerre, pour les grans maux qui arriuent d'icelle.*

Ces mots sont contenus aux liures imprimez deuant les troubles, mais retranchez malicieusement des nouueaux imprimez par la Ligue, de peur que ce cousteau de verité coupast la gorge aux supposts de mensonge.

Or nostre Roy est graces à Dieu tres-Catholique, & quand bien il ne le seroit, Dieu qui s'est voulu faire enregistrer és registres de l'Empereur Auguste, lors qu'il ordonna estre faite description des hommes de l'Vniuers: & le commandement de payer le tribut à Cesar, quoy que payen & profane: l'exemple aussi de saint Paul qui appella à Neron lors Empereur tres-mechant, monstrent le Roy deuoir estre obey tel que Dieu le donne. Les exemples des trente trois premiers Papes tous morts consecutiuellement martyrs, nous l'ont ainsi monstté, qui iamais ne firent degainer glaue contre les Empereurs persecuteurs ou heretiques. Le mesme a fait saint Gregoire Pape, dediant ses Dialogues à Theodelinde femme d'Agilulphc roy Lombard, tenant encor du paganisme, pour par la douceur & pratique de sa femme, l'amener au Christianisme, & acquerir paix à l'Eglise. Le mesme a fait Leon Pape, se prosternant aux pieds

du mechant Attila. Ainsi en vſa Iean Pape premier du nom, allant de Rome à Constantinople vers Iuſtin Empereur, pour le prier d'ouurir les temples des Arriens qu'il auoit fait fermer, de peur que les Arriens, qui de ſoy-mesmes ſe pouuoient conſumer, ne troublaſſent l'Egliſe.

Ne doutez pas auſſi que noſtre ſainct pere le Pape meue de ces exemples, n'eſſaye de reparer le tort fait à noſtre Roy par aucuns mal-informez de ſa iuſtice, ou poſſible emportez de la paſſion Eſpagnole. Il le recognoiſtra tel qu'il eſt fils ainſné de l'Egliſe: Il ſe ſouuiendra que noſtre Roy eſt ſorty de ceux qui ont conſerué & aumoſné à l'Egliſe le plus beau de leur bien. Las! ſa Sainteté ne pourroit moins faire à noſtre Roy Henry quatrieme, que par l'vn de ſes predeceſſeurs a eſté fait puis quelques anneés à la roine de Suede, excommuniée & relapſe, la receuant tres-volontiers en la perſonne de ſes Ambaſſadeurs, avec ioye & lieſſe publique, au giron de l'Egliſe.

Les ſaincts Peres n'ont iamais reſuſé les Princes repentans, teſmoin la paix de Conſtance, & autres decrets, dont les hiſtoires & les ſaincts Conciles ſont pleins. Sa Sainteté peut voir combien eſt enuié le parta-

ge que Dieu a donné à nostre Roy en la terre : mais il dira au roy d'Espagne enuieux d'iceluy, ce que dit tressagement le Pape Boniface huitieme à Albert d'Austriche, qui par ses pratiques se fit elire Empereur, au preiudice de Guillaume comte de Nassau, lors Empereur d'Allemagne, qu'il tua en baraille : il luy dira, dy-ie, que celuy qui a tué l'Empereur de sa propre main, est indigne d'estre pourueu & confirmé à l'Empire. Car c'est de sa main & menee que la mort est pourchassée à nostre Royaume de France, auquel il a voulu se faire nommer Roy, mais Dieu mercy il a perdu sa peine.

Le saint Pere qui estoit du temps d'Emmanuel Empereur d'Orient, ne voulut entendre aux offres qu'il faisoit, de faire reünir l'Eglise de Grece avec la Latine, pourueu que lon reünist l'Empire d'Occident, vacant par la priuation de Frideric, à celuy d'Orient : preuoyant assez que c'estoit chose pleine de soupçon, de rendre l'Eglise vniuerselle dependante humainement d'une seule puissance : Et sa sainteté voudroit elle affoiblir vn Roy ou vn Royaume de France, qui est le vray bras de l'Eglise, pour laisser croistre le desbordement d'un roy & d'une prouince plus meslée de races Mau-

res, Sarrazines, Gothiques, que Chrestiennes, n'ayans autant de sainteté & respect aux choses sacrees, que lon a au moindre village de France?

Sa Sainteté recognoistra que les Rois de France & leurs peuples se sont roidis & ont tenu bon pour l'Eglise, lors que l'Asie, l'Afrique, l'Espagne, l'Italie, & presque l'Univers, estoient pleins d'Arrianisme & heresies. Se souviendra aussi (& s'en puissent pour iamaïs resouuenir ses successeurs au saint Siege) que l'annee de la naissance du roy à present d'Espagne Philippes, a esté fatale & malencontreuse au saint Siege, ayant en icelle l'armee de Charles quint son pere prins & saccagé Rome, rançonné le saint pere Clement, & ses Cardinaux, ruiné & profané les Temples & Eglises de Rome, ce que ne voulut faire Attila, nommé pour ses inhumanitez le fleau de Dieu.

Le Roy Henry quatrieme de France recognoist assez qu'il a vn iour à rendre conte de sa charge, & que Dieu le fera obeir de ses sujets, honorer & seruir, ainsi qu'il obeira à Dieu, l'honorera & seruira: il sçait comme le premier roy mortel & pere du monde Adam, auant son peché estoit respecté de tous animaux comme seigneur d'eux,

d'iceux, mais qu'après son péché les animaux se rebellerent contre luy, le lyon le voulant demembrer, le cheval ruer, le chien le mordre, & ainsi les autres: & que Dieu a possible permis que le mesme se soit fait à luy par aucuns ses sujets (encores que s'ils ne se conuertissent ils n'en eschaperont la vengeance diuine, pour auoir par ledit sieur Roy (quoy qu'à la suggestion de ses ennemis) fouruoyé en la religion. Sa Maiesté sçait trop bien qu'il ne peut acquerir la grace de Dieu, si estant par luy eleué en plus eminent degré que les autres, il n'est aussi plus eminent qu'eux en toute sorte de vertu. Il monstre ja par la diligence dont il vse au faict des armes, qu'auancé comme il est en la iournee de son âge, & luy restant tant de choses à faire par l'Vniuers (dont Dieu semble luy auoir reserué l'honneur & le labeur) il veut ensuiure les oïseaux du pais plus Septentrional, où le iour n'ayant presque qu'une heure de duree, ils vollent plus courageusement & legerement que nuls autres de la terre. Car il a en peu de temps reduit le plus des peuples de son Royaume, & leur monstre par la douceur dont il a vse enuers eux, qu'il les a conquis non pour son bié particulier, mais pour les mettre en plus grand'aïse.

Desia sa Maieſté ne medite autre choſe
 que faire de ſa Cour le cabinet des choſes
 plus exquiſes de la terre, & qu'en icelle ſe
 retrèuuent les plus hommes de bien & ac-
 complis de ce monde. La vertu ſera en prix
 ſi iamaïs elle le fut : il pretend ſi toſt qu'il
 aura ſatisfait à ceux à qui ſon peuple (miſe-
 rable qu'il eſt) l'a pour ſes folies paſſées con-
 traint promettre recompensés, abolir ou
 moderer tellement les tailles que ſes pau-
 ures ſujets en prient à iamaïs Dieu pour
 luy, & il en ſoit memoire à toute la poſteri-
 té. Il recognoiſt aſſez que de l'excés deſdi-
 tes tailles ſon peuple demeure en languueur,
 & la nobleſſe qui le ſuit eſt faite pauvre,
 pour ne pouuoir ny oſer le païſan labourer
 les terres de la nobleſſe, ny d'autres, pour la
 crainte deſdites tailles : au moyen dequoy
 les terres demeureroient ſans culture, & la
 nobleſſe qui n'a autre richeſſe que de la ter-
 re, ne le pourroit plus ſuivre & ſeruir, ny le
 peuple des champs & villes, forgeron des
 commoditez du Royaume, le ſecourir.


Vous donc Nobleſſe (ſi aucuns y a de
 ceste qualité qui vueille, contre le deuoir
 de ſa profeſſion, porter l'eſcharpe de liguë
 au lieu de la noſtre blanche, couleur des
 Lys de France) quel honneur penſez-vous

laisser à vos enfans, de dire que vous ayez fomenté & nourry ceste hydre de Ligue, qui nous a produit tant de miseres? voyez vous point que vous estouffez la clairté de vos races sous les cendres de vostre rebellion? Prenez, prenez la couleur de vos freres, & ne permettez que de noble vostre race demeure vileine, tachee de trahison vers vous-mesmes, & vers vostre patrie.

Et vous peuples, desquels la prosperité est tant differente de celle en laquelle vous laisserent nos defuncts Rois & peres, voyez la sur-face de nostre pauvre país anciennement parée de vos beaux plants & bastiments (ie ne le puis dire sans regrets) maintenant deserte, herissonnee, & sans culture. Où est ceste liberté promise par la Ligue? Helas! (comme disoit, ie croy, Theophraste, aux Grecs) on y a bien meslé du vinaigre. Où est ceste abolition de tailles? helas ils les ont sextuplees! Où est ce restablissement de religion? helas ils ont abbatu & profané vos Eglises! les Prestres mesmes prenans les armes se sont desbordez à mille vilenies! Considérez qu'il n'y a en France iustice ny force publique que de vostre Roy, qui vous puisse garantir d'iniure. Voyez-vous point comme vous allez ap-

pauvrisans, & que ces affamez Gouverneurs, desquels vous nourrissez la rebellion, vous estoufferont vn de ces iours pour auoir vostre sang, escorcheront pour auoir vostre peau, puis que d'entre eux le plus riche n'a dequoy viure si ce n'est de vostre substance, ny commodité qu'il ne forge sur vostre ja foible enclume. Viuez, viuez sous vostre Roy & ses loix, chassez ces prescheurs à gages, ces miserables boute-feux & destructeurs de nostre patrie: ce n'est point la religion: le Duc de Mayenne recognoist en auoir esté abusé: on le sçait bien, & lon espere, puis que la couronne (comme disoit Tite fils de Vespasian, appelé pour sa bonté, delices du monde) est vn don de Dieu, conferé à qui il luy plaist par sa seule main & volonté pure, que ledit Duc de Mayenne recognoistra sa maiesté pour son Roy, se fiera en luy plus qu'en autre. Il sçait bien que les maximes d'Espagne sont de se defaire tousiours de ceux qui leur aident aux conquestes de leurs prouinces, disans iustement qu'ils ne se pourroient fier à la foy de ceux qui auroient manqué à celle qu'ils doiuent à leur patrie: & quand tout cela ne seroit, iamais homme qui les a suiuis, n'y est mort que miserable. Ledit Duc de Mayen-

ne a plus que trop fait, quand il y eust eu lieu de venger la mort de ses freres, de laquelle le Roy Henry quatrieme ne fut iamais consentant. S'il passe outre, il demeure à iamais tres-coulpable. Qu'il ne laisse donc eschaper ceste occasion pendant qu'il est temps, de se rendre à son Roy avec honneur, faisant paroistre le commun pre-texte de la religion, & non autre chose l'auoir meu à prendre les armes, & qu'il se souuienne qu'il a affaire à vn Roy de France, lequel ne sera iamais sans successeur, qui en vengera les iniures: que sa Maiesté se pourra vn iour accorder avec le roy d'Espagne, & pourroit ledit Duc de Mayenne lors demeurer opprimé, & peu estimé. Qu'il recognoisse que tout Chrestien doit auoir ce but de la saluation de son ame, laquelle il ne peut acquerir, ny bien à ses enfans, que rendant au Roy ce qu'il detient iniustement de son Royaume, contre son deuoir de sujet, vassal & officier de la couronne.



*Procés verbal de l'hommage faict par
Philippes Archiduc d'Autriche, Com-
te de Flandres, &c. au Tres-Chrestien
Roy de France Loys XII. de ce nom,
l'an 1499.*

IEAN Amys Notaire & Secretai-
re du Roy nostre Sire, Pource
qu'il a pléu à noble & puissant
seigneur monsieur messire Guy
de Rochefort, Chevalier, seigneur de Plu-
vor & de Labergemant, Chancelier de
France, tant de sa grace me preferer, que de
m'auoir ordonné & commandé les lettres
de la reception de l'hommage fait au Roy
nostredit sieur en ses mains par tres-haut &
tres-puissant prince monsieur Philippes fils
du Roy des Romains, Archiduc d'Autri-
che, Comte de Flandres, d'Atthois, & de
Charrolois, le cinquieme iour de ce present
mois de Iuillet, 1499. estant mondit sieur
le Chancelier en la cité d'Amas en l'hostel
Episcopal: & que tels grans actes, termes &
ceremonies qui en ce ont esté gardees &
obseruees à l'honneur & exaltation, profit

& vtilité du Roy & de sa couronne, sont dignes de perpetuelle memoire, me suis enhardy de rediger par escrit tout ce que i'ay peu voir & entendu touchant ce present acte & matiere, & mesmement depuis le penultime iour de Iuin dernier passé iusques audit cinquieme iour de Iuillet ensuiuant. Et pour entrer en ladite matiere, est chose certaine & veritable que ledit monsieur le Chancelier ledit iour se partit l'apresdisnee de la ville de Dourlent ou pais de Picardie, pour aller en la cité d'Arras, où cedit iour il arriva tousiours accompagné de messieurs de Rauestain, & de la Grutire, de messire Charles de la Vernade, cheualier sieur dudit lieu, maistre Christofle de Cremonne, Conseillers & maistres des Requestes ordinaires de l'Hostel, messire Raoul de Launoy Baillif d'Amiens, maistres François d'Estain, Hugues de Baigel, Almaury de Quinquiville, Nicole de Foix, Philippes d'Estas, Richard Nepueu, Pierre de la Vernade Conseillers ordinaires: Macé Toustain, Procureur general d'iceluy sieur en son grand Conseil, Jean Burdelot Procureur general d'iceluy sieur en sa Cour de Parlement à Paris: Antoine le Viste rapporteur de la Chancellerie de France:

Dreux

Dreux Budé, Jean de Villebresme, Raoul Guyot, Philippes Maillart, Notaires & Secretaires du Roy nostredit sieur, & de moy. Et ainsi que mondit sieur le Chancelier fut à tout sadite compagnie comme à lieüe & demie de ladite cité d'Arras, cheuauchant en bon ordre, ayant au deuant de luy l'Huissier du grand Conseil portant sa masse decouuerte, armoyee des armes du Roy: & apres ledit Huissier le Chauffe-cire, qui portoit le Seel, ainsi qu'il est accoustumé quand mondit sieur le Chancelier cheuauche par champs: & lequel Chauffe-cire estoit costoyé de deux rois d'Armes du Roy nostredit seigneur, vestus de leurs cottes d'armes, c'est à sçauoir, Mont-ioye premier roy d'Armes de France, & Normandie, arriuerent venans au deuant de mondit sieur le Chancelier, l'Euesque de Cambray messire Thomas de Pleures, cheualier, Chancelier de mondit sieur l'Archiduc, monsieur le Comte de Nassau, le sieur de Fiennes, & autres, tant Cheualiers qu'Escuyers, & gens de conseil de mondit sieur l'Archiduc. Lequel messire Thomas de Pleures soy adressant à mondit sieur le Chancelier, luy dist & recita que les sieurs de sa compagnie & luy estoient enuoyez par mondit sieur l'Ar-

chiduc son maistre luy dire, que mondit sieur l'Archiduc estoit mout ioyeux de sa venue, & des autres sieurs estans avec luy, & qu'ils fussent les tresbien venus, & autres belles, bonnes & douces paroles: faisant tous les dessusdits de la part de mondit sieur l'Archiduc grandes reuerēces & honneurs à mondit sieur le Chancelier, & grand accueil à mes autres sieurs de sa compagnie: desquelles choses mondit sieur le Chancelier mercia mout honorablement mondit sieur l'Archiduc, & lesdits sieurs qui estoient illec venus de sa part. Et tost apres se mirent d'une part & d'autre ensemblement à chemin, pour aller en ladite cité. Et comme toute la compagnie fut à l'entree des faux-bourgs d'icelle cité, mondit sieur le Chancelier fut rencontré & abordé de mondit sieur l'Archiduc, lequel pour le recevoir & venir au deuant s'estoit party de cheual de l'Abbaye de saint Vas en la ville d'Arras, & passé toute ladite ville & cité, où il y a chemin. Et incontinent que mondit sieur l'Archiduc accompagné de grand nombre tant Cheualiers de son ordre qu'Escuyers, & autres officiers de sa maison, qui tous estoient en rang d'une part & d'autre, pour faire chemin & place à mon-

dit sieur le Chancelier & ceux de sa compagnie, apperceut mondit sieur le Chancelier, mist la main au bonnet en soy du tout descourant, & fit marcher sa mulle contre mondit sieur le Chancelier, lequel il embrassa, ayant tousiours le bonnet hors la teste, luy dist qu'il fust le bien venu, en luy demandant en ceste maniere, Comment se porte monsieur le Roy? A quoy mondit sieur le Chancelier respondit, que tresbien graces à Dieu, comme il auoit intention de plus amplement luy dire: Semblablement fist mondit sieur l'Archiduc à messieurs de Rauestain & à la Grutire grand accueil, & salua gracieusement mesdits sieurs des Requestes & Gens du conseil du Roy. Et apres plusieurs gracieuses paroles & contenance que tenoit mondit sieur l'Archiduc à messieurs le Chancelier & de Rauestain, ayant tousiours iceluy mondit sieur l'Archiduc son bonnet en sa main, sans soy vouloir couvrir, sinon qu'aussi mondit sieur le Chancelier se couvrist: mondit sieur l'Archiduc, & mondit sieur le Chancelier se meirent eux deux ensemble pour entrer en ladite cité, mondit sieur le Chancelier tousiours à dextre, & cheuauchant au deuant d'eux ledit Huissier dudit

grand Conseil tenant sadite masse haute & descouuerte, & ledit Chauffe-cire ayant le Seel du Roy sur son dos, comme il est de coustume quand mondit sieur le Chancelier cheuauche par le Royaume, & deux rois d'Armes en leur ordre, sans ce qu'entre mesdits sieurs l'Archiduc & Chancelier y eust autre. Quelle chose estoit & fut bien regardée, tant par lesdits Gens & officiers de mondit sieur l'Archiduc, que par le peuple, dont y auoit grand nombre tant de dehors la cité que dedans, illec venus pour voir l'entree. Et mena & conduit mondit sieur l'Archiduc mondit sieur le Chancelier tousiours parlant à luy, en soy souuent descourant, sans ce qu'il se couurist que mondit sieur le Chancelier ne fust aussi tost couuert, iusques à l'entree du cloistre de la grande Eglise: voulant mondit sieur l'Archiduc à toute force le mener iusques en sa maison Episcopale, en laquelle mondit sieur le Chancelier a tousiours esté logé, ne les requestes & prieres que mondit sieur le Chancelier luy fist de soy contenter de tant luy en auoir fait pour l'honneur du Roy. Et sur ces paroles se departit mondit sieur l'Archiduc de mondit sieur le Chancelier, s'en alla en la ville d'Arras en son dit logis

de saint Vas, & mondit sieur le Chancelier en ladite maison Episcopale, accompagné de mondit sieur le Comte de Nassau, & autres grands personnages de la maison de mondit sieur l'Archiduc: & apres chacun de la compagnie & bande de mondit sieur le Chancelier sen alla ou logis qui luy estoit ordonné. Et apres plusieurs alces & venues, qui par lesdits messire Thomas de Pleures, Comte Nassau, le sieur de Mont-labais, & autres officiers de mondit sieur l'Archiduc, durant les iours du lundy, mardy, mercredy & ieudy ensuiuant, premier, second, tiers & quart de cedit present mois de Iuillet, furent faites par deuers mondit sieur le Chancelier en sondit logis, pour traitter & conclure sur aucunes matieres, poincts & articles mis auant par ledit Procureur general du Roy nostredit sieur en sa Cour de Parlement. Et lesdites matieres prinles fin, fut ledit iour de ieudy requis par les dessus-dits Officiers de mondit sieur l'Archiduc à mondit sieur le Chancelier, soy vouloir disposer à la reception de l'hommage que mondit sieur l'Archiduc estoit tenu faire au Roy, pour raison des Pairrie & Comté de Flandres, & semblablement des Comtez d'Arthois, & de Charrolois, & autres

terres tenues & mouuans du Roy nostre-
dit sieur à cause de sa couronne : & pour ce
faire , assigner iour & heure à mondit sieur
l'Archiduc , à fin de venir deuers luy à faire
son deuoir. Lequel mondit sieur le Chan-
celier fit response , que le lendemain qui
estoit vendredy , & cinquieme iour dudit
mois , fust à neuf ou dix heures du matin il
seroit prest de le receuoir : lesquels iour &
heure furent acceptees par lesdits officiers
de mondit sieur l'Archiduc. A ceste inten-
tion mondit sieur le Chancelier ordonna
pour ce faire, lieu & place en la seconde sal-
le de sondit logis, laquelle estoit bien tapis-
see , & ladite place estre haultee comme de
deux marches, & y estre mise vne chaire pa-
ree & couuerte de fleurs de Lys, en laquelle
il seroit assis durant ladite reception , & les
paroles que seroient à proferer touchant le-
dit hommage, ce qui fut fait. Et ledit iour
de vendredy , comme heure de dix heu-
res du matin , mondit sieur le Chancelier
estant en sa Chambre accompagné de mes-
dits sieurs desdites requestes de l'Hostel,
Gens de conseil, du Baillif d'Amiens & au-
tres dessusnommez , luy fut venu dire par
ledit maistre Thomas de Pleures , & autres
Officiers de mondit sieur l'Archiduc , que

mondit sieur l'Archiduc estoit party de son logis, s'en venoit deuers luy pour faire ledit hommage, & qu'il se voulist disposer & mettre en lieu pour iceluy receuoir. A quoy monsieur le Chancelier fist responce, que si tost que mondit sieur seroit venu au lieu ordonné pour iceluy receuoir à faire ledit hommage, qu'il estoit & seroit prest. Et par deux autres fois vindrent encor autres desdits officiers, tant Chambellans que Secretaires de mondit sieur l'Archiduc, la premiere fois dire à mondit sieur le Chancelier, comme mondit sieur l'Archiduc estoit en la premiere qui joint à la seconde, lequel mondit sieur le Chancelier pource ne se meut. Et à la deuxieme fois, pource qu'iceux Officiers affermoient mondit sieur l'Archiduc estre entré en la seconde salle, comme il estoit vray, & aussi que mondit sieur de la Grutur, & messire Robert de Framezelles, Chambellan du Roy, lesquels & mondit sieur de Rauestain auoient accompagné mondit sieur l'Archiduc depuis son logis iusques en ladite seconde salle, vindrent dire à mondit sieur le Chancelier, que mondit sieur l'Archiduc estoit en icelle seconde salle, & ja au propre lieu & place appareillez pour ledit

hommage. Lors mondit sieur le Chancelier vestu d'une robe de velours cramoisy, son chapeau en sa teste, se partit de sadite chambre, laquelle ioignoit à ladite salle, en la maniere qui s'ensuit: C'est à sçauoir, ayant au deuant de luy ledit Huissier dudit grand Conseil, portant sadite masse descouuerte & haute, qui à haute voix disoit & crioit si tost qu'il fut hors d'icelle chambre, & entré en icelle seconde salle, pource qu'en icelle y auoit si grand nombre de gens, tant des gens & officiers de mondit sieur l'Archiduc qu'autres, qu'à peine se pouuoit lon tourner, ces mots par trois ou quatre fois, Deuant deuant faites place: & apres ledit Huissier alloient lesdits deux rois d'Armes du Roy nostredit sieur, vestus desdites cottes d'armes dudit sieur: puis marchoit mondit sieur le Chancelier, & apres luy messieurs des requestes dudit grand Conseil, & Notaires & Secretaires du Roy nostredit sieur, avec lesquels i'estois. Et pource que mondit sieur le Chancelier m'auoit ordonné auparauant son parlement d'icelle chambre, me mettre en lieu & place pour estre present à ladite reception dudit hommage, ouir les paroles tant de luy que de mondit sieur l'Archiduc, qui y feroient

y feroient dittes & proferées par eux deux,
 & prendre le commandement des lettres à
 ce nécessaires, ie m'auançay pour ce faire.
 Et est à ſçauoir qu'ainſi que mondit ſieur le
 Chancelier approcha de la chaire où il de-
 uoit ſe ſeoir, mondit ſieur l'Archiduc qui
 aupres d'icelle eſtoit attendant mondit
 ſieur le Chancelier, oſta incontinent le
 bonnet de ſa teſte, en diſant à mondit ſieur
 le Chancelier ces mots: Monsieur, Dieu
 vous doint bon iour, & en ce diſant baiffa
 fort ſa teſte: & mondit ſieur le Chancelier
 ſans rien proferer ne dire mot miſt ſeule-
 ment la main à ſon chapeau qu'il auoit en
 ſa teſte, ſans autrement iceluy oſter, puis
 ſaſſiſt en ſadite chaire, & incontinent l'un
 deſdits rois d'Armes, ainſi qu'ordonné luy
 auoit eſté par mondit ſieur le Chancelier,
 cria à haute voix par trois fois, Faites paix.
 Ce fait mondit ſieur l'Archiduc teſte nue ſe
 presenta à mondit ſieur le Chancelier pour
 faire ſondit hommage, diſant, Monsieur ie
 ſuis icy venu deuers vous pour faire l'hom-
 mage que tenu ſuis faire à monsieur le Roy,
 touchant mes Pairrie & comtez de Flan-
 dres, d'Arthois, & de Charrolois, lesquelles
 tiens de monsieur le Roy à cauſe de ſa cou-
 ronne. Lors mondit ſieur le Chancelier

ainsi assis qu'il estoit en sadite chaire, & tout couuert de bonnet & chapeau, luy demanda s'il auoit ceinture, dague, ou autre baston: lequel mondit sieur l'Archiduc en leuant sa robe qui estoit sans ceinture, dist que non. Cedit, monsieur le Chancelier luy mist les deux mains entre les siennes, & icelles ainsi tenant & iointes, mondit sieur l'Archiduc se veut encliner, monstrant apparence de soy vouloir mettre à genoux, ce que mondit sieur le Chancelier ne voulut souffrir; ains en le souleuant par seldites mains qu'il tenoit comme dit est, luy dist ces mots, Il suffist de vostre bon vouloir. Puis mondit sieur le Chancelier luy profera en ceste maniere luy tenant tousiours seldites mains iointes, & ayant mondit sieur l'Archiduc la teste nue, & encores sefforçant tousiours mettre à genoux, Vous deuez homme du Roy vostre souverain seigneur, & luy faites foy & hommage lige, pour raison des Pairrie & comté de Flandres, & aussi des comtez d'Arthois & de Charrolois, & de toutes autres terres que tenez, & qui sont mouuans & reenus du Roy à cause de sa couronne, luy promettez de le seruir iusques à la mort inclusiuement enuers & contre tous ceux qui peuuent viure

& mourir sans nul reseruer : de procurer
 son bien, & euitier son dommage, & vous
 conduire & acquitter enuers luy comme
 enuers vostre souuerain seigneur. A quoy
 fut par mondit sieur l'Archiduc respondy,
 Par ma foy ainsi le promets, & ainsi le feray.
 Et ce dict, mondit sieur le Chancelier luy
 dist ces mots, Et ie vous y reçoÿ, sauf le
 droit du Roy en autres choses, & l'autruÿ
 en toutes. Puis tendit la iouë, en laquelle
 monsieur le Chancelier le baïsa. Puis mon-
 dit sieur l'Archiduc requist & demanda à
 mondit sieur le Chancelier lettres de ladite
 reception dudit hommage, lesquelles mon-
 dit sieur le Chancelier me commanda luy
 faire, & icelles luy depescher. Lors mondit
 sieur le Chancelier se leua de ladite chaire,
 & se descourrit de chapeau & bonnet, &
 fist reuerence à mondit sieur l'Archiduc en
 luy disant ces mots, Monsieur ie faisoÿ na-
 gueres office de Roy, representant sa per-
 sonne, & de present ie suis Guy de Roche-
 fort vostre tres-humble seruiteur, tousiours
 prest de vous seruir enuers le Roy mon sou-
 uerain seigneur & maistre, en tout ce qu'il
 vous plaira me commander : dont mondit
 sieur l'Archiduc le remercia, luy disant
 en ces mots, Je vous mercie monsieur le

Chancelier, & vous prie qu'en tous mes af-
 faires enuers mondit sieur le Roy, vous me
 vueillez tousiours auoir pour recomman-
 dée. Telsmoin mon sein manuel cy mis, le
 premier iour d'Aoust l'an mil quatre cens
 quatre vingts dixneuf. Sic signatum, AMYS.

Extrait des registres des ordonnances
 Royaux, enregistres en la Cour de Parle-
 ment.

Ainsi signé, DV TILLET.

